

31 JAN 2003

DR MAHATHIR LANCAR BUKU FATIMAH HASHIM

KUALA LUMPUR, 31 Jan (Bernama) -- Perdana Menteri Datuk Seri Dr Mahathir Mohamad hari ini melancarkan buku biografi Tan Sri Fatimah Hashim, wanita pertama yang dilantik sebagai menteri di Malaysia.

Buku berjudul "Tan Sri Fatimah: Potret Seorang Pemimpin" yang ditulis oleh Prof Emeritus Datuk Dr Nik Safiah Karim dan Dr Rokiah Talib mengisahkan bagaimana Fatimah menjadi model wanita yang berjaya dalam kerjaya tanpa mengorbankan keluarga.

Fatimah yang dilahirkan pada 25 Dis, 1924 di Kampung Parit Keroma, Muar, Johor dilantik sebagai Menteri Kebajikan Am pada 24 Mei, 1969. Beliau terserlah sebagai penggerak Kaum Ibu Umno.

Buku itu memperkenalkan Fatimah kepada kalangan pembaca, khususnya generasi muda yang belum pernah mendengar nama beliau dan pencapaiannya di dalam arena politik dan badan sukarela wanita.

Bersempena dengan majlis pelancaran buku itu, Arkib Negara mengadakan pameran bertemakan "Tan Sri Fatimah: Sri Kandi Sumber Inspirasi" yang menjejak pembabitan Fatimah di dalam politik dan pergerakan amal.

Yang turut hadir pada majlis itu ialah isteri perdana menteri, Datin Seri Dr Siti Hasmah Mohd Ali, Timbalan Perdana Menteri Datuk Seri Abdullah Ahmad Badawi dan beberapa menteri kabinet.

-- BERNAMA

HS MFJ RHM